

## PETRI

Petri.  
Petri tunni petri ciatti  
cuticciuna  
nâ terra straviati a ‘mienzu ê spini  
iu  
all’accua lavati e nô vientu  
e ô suli ca coci  
bbi viru  
e silinziusi cuntari bbi sientu  
ddi tempa, luntanu .

E se ora nê manu bbi cuògghiu  
m’addùgnu râ lima rô vientu  
e ‘a raspa ri l’accua  
e râ zappa li ciàji  
e â aratu  
e ‘i rroti rô carrettu nê carrati,  
nê jòrna  
rô tiempu  
‘n caminu.

Però se ‘u ristinu  
cunzati nê mura bbi cianta,  
nê strati, mura luonchi,  
nê muraggia, mura tunni  
e nê casi rê paisi,  
ritti  
jàuti appisi  
stati ‘nciusi.

Ma juntu mi pari ‘i mumentu  
ca finarmenti ‘a vuci bbi veni  
e a cu bbi senti  
ora  
ci cuntati li peni  
e a cu bbi viri  
‘u ‘ntagghiu râ mazza ammustrati  
e ‘u ‘mpastu ca ‘a faccia bbi ‘ntuppa  
e ‘u pisu  
ca ‘i supra bbi posa  
nô schinu.

E ora ciangiti,  
petri,  
cu l’accua ca ciovi  
ciangiti  
piuliannu ccô vientu ca sciuscia  
e cchê trona e cchê lampi  
vuciati,  
ccâ spranza  
ca arriva ‘na manu  
e bbi senti  
ca i’ ‘mmutta sti mura,  
sti casi e ‘i muraggia  
ri supra e ddi sutta  
e ‘i scaca,  
e ‘nciànu  
ccû forza bbi smovi  
turnannu luntanu,  
nâ terra  
straviati.